



O Volapükaf lens Löfik !

Pötu yelacen lofob flenes valik oba vipis gudikün obik pro yel nulik. Yel : 1999 blinonös oles valik läbi e beni, e pato i sauni ! ibä saun binon bal dalabotas gretikün, keli kanobs labön. Desins gudik ä frutiks valik plöponsös ün yel anu eprimöl !

Ün prim yela nulik, binos kösömikos ad gelogön love yel epasetiköl. Kisi edunobs pro Volapük ? Ob ebükob Sirküläpenädi obsik ün mul alik, ed ols spelabo ereidols oni. Atos binos - li valikos, kelosi edunobs pro Volapük ? If so, edunobs bosi, e dunön bosi binos fümiko gudikum, ka dunön nosi !

Cedob, das mutobs säkön obes dini bal : Kikodo nitedalobs - li tefü Volapük ? Bi Volapük binon pledadin - li ? Bi Volapük labon völad pükavik - li ? Bi Volapük ovedon valemäpük ad fino pagebön in dakosäd bevünetik - li ?

Bü yels foldegmäl, ced redakana ela <Volapükagased pro Nedänapükans> äbinon sökölosi :

- If mens bleibons plägön valemäpükis difik, tän no odagetobs diali ela <Schleyer> ;
- Mekavapüks votik, bo to döfs oksik, binons geboviks, e slopans onsik i labons diali ot, äsä slopans Volapüka.
- Dial kanon te padagetön, if alan plägön te valemäpüki bal, sevabo: Volapüki, kel evedon dakosädamedöm süperik.

Metod at, binon - li ebo ot obas adele ? Nö ! Zuo sevobs gudiko, das püks bevünetik votik no progedons ma vips nogantükanas onsik, bi do kanoy lärnön in juls püks natik mödik, kösömiko no binos so tefü püks mekavik seimik !

E pro yel nulik - li ? Leadobsös kipedön divis pasetik Volapüka e leadobsös i jäfön literati nulik ad jonön liegöfi e fägi püka ün tim anuik ! Ekö blig obsik - no nedunobsös osi !

Valikosi Gudikün Oles ed Olikanes

Ralph

SPIKOTAMALÄRNODS PRO SPANYÄNAPÜKANS (DIL BALID)
LÄRNOD TELID

SÄKS E GESPIKS TEFÜ „FAMÜL OBİK”

| | |
|--|--|
| Kim binob-li ? | Binol söl : „ <i>Juan Hernandez</i> .” |
| Kif jimatän obik binof-li ? | Läd „ <i>Carman Hernandez y Ruiz</i> ” binof jimatän obik. |
| Lio panemol - li ? | Panemob „ <i>Pedro Álvarez</i> .” |
| Labob-li cili bal u cilis tel ? | Labob cilis tel. |
| El „ <i>María</i> ” binof - li daut obik ? | Si ! o söl ! Fümö ! binof daut obik. |
| Lifayelis liomödotik labof - li ? | Labof lifayelis jöl. |
| Kisí dunol - li ? | Reidob buki. |
| Ko kin „ <i>Juan</i> ” pledom - li ? | Pledom ko kat. |
| El „ <i>Juan</i> ” labom - li blodis ? | Nö ! no labom blodis. |
| Lû kim pip at duton - li ? | Duton lû fat obik. |
| Smököl - li ? | Nö ! o söl ! no smökob. |
| Fat obik smököm - li ? | Si ! o söl ! |
| Voms smökofs - li ? | Ans sio, votans no. [û : Ans: si! votans: nö!] |

LÄRNOD KILID

DOM OBSIK

Lödobs in plödaharat zifa : „*México*” in dom privatik. Sis yels deg lödobs is ed atos pliton obis vemo. Dom obsik binon vemo spadöfik.

Labon cemís deg, sevabo: lödacemi, studacemi, fidacemi, kvisinöpi, viktualacemi, banacemi e slipacemis fol.

Fo dom gad dabínon ko foned smalík in zänod (oka). In gad rosadabímüls mödik dabínons.

Zänodü dom yad binon, kel binon butopil famüla obsik. Us yofobs obis dü livüps. Glun pepavon me tvíls jóník. Floraskals mödik labü flors valasotik binons : rosads, viols, leís, daliads, kikkólaviols, nards e r.

Demü kods büsidík buükob zifalífi. [Lenoid no pliton obi [u : No plidob lenoid], ab kanob tuvön stíli zesüdík in yad obik.

In fian bai nügolöp pro motoravab [= tood] dabínon. Garad topon plu pódo. Sus garad dünanacem dabínon.

BLED GRÜNIK (DIL FOLID)

KONED FA <THEODOR STORM>

Fino, bi <Regine> nog ai no ägekömf, e lit muna ya isükömon de flan votik gada, äläädöm ad leditön de jipul. Ägolom ini gad; ab leno älogom us ofi. Ekö ! nu äliilom noidi vü pisälabets; ed is ätuvom ofi ko bäsetil nâi of, kel ya lafiko pifulükon me pisälaligums piplököl.

<Binos latik, o <Regine> !> äsagom, du ästepom vü pisälaplans lü of, <omutob mogolön; obinobös vilöfo in zif bü solasülöpikam !>

<Regine> älaiplökof, nes lölogön. <No binon vo so fagik,> äsagof, ed äbiegädo, ed ätenükof nami vü stafädils lü ligums dibiküno älagölis.

<Kömo! - li i semikna us in zif ?> <Gabriel> äsäkom.

<Ob - li ? - - Ob, nö ! No degolob so fagiko. Te balna ebinob moik de lom; fat älabom söri in topäd nolüdik, ävabobs tio dü del lölik. Ab no plidob topi usik; no äsuemob spikami menas, e ven äspikob ko ons, tän äsäkons ai obe, kitopo lom obik äbinon.>

<Ab is labol vo lifi soalik; dü dels valik soeliko ko man bäldik !>

Änutof. <Dono in vilag binos yofikum ! Esteifons i suvo ad slüdön bäldikani; dalogal e mot obik; ab no fealotädöm isao; sagom, das no kanom ➡sufidön in lut bevü doms in vilagasüt.>

<Gabriel> ipladom oki nâi of ed äyufom ofi pö plök. <Regine> älemufükof nu e täno bäsetili, kel ya no plu ävilon kipön stoki. Dagikam äpluikon aiplu; äsenidons me nams lü ligums, kelis töbo nog äkanons logön, e kels fino i dönu ädoslifons love siem bäseta kumiko pifulüköla. Ab no ästopedons; älaiplökons nevifiko, äsif atos pibligädon ones. - Nu <Gabriel> äliilom toni, toni dumik, äsva äkömon se glun; e glun dis om ädremon töbo küpoviko. - Äbiegom ko lil okik lü glun ed ädalilom. Ekö ! dönu ton ädabinon; e suniko nogna. Kis äjenon - li us, das nu dü neit ➡kâns päjütükons ? - - <Regine> äjinofo elilön nosi atos; ibä ätovülöf boso kapi, ed äsagof : <Düp: deg tonon in vilag.> <Gabriel> äläbunom; nesufäd ledesirik äsiükon pö om, no äplitos omi lunüfikumo ad stebön in stil nenbüosenik topa at. <O Regine> ! äsagom laodiko, <if bo ogekömoböv - la seimna !>

Älöfflekof spidiko kapi oka lü om, ed älogom pö lulit ini logs gretik nidöl ofa.

Täno älilons stepis mana bäldik su luveg gada, e <Gabriel > äkosgolom omi ad danön omi, e ad sagön ome, das ävilom degolön. Ven ye atan ävilom nogna plänön lüodi vega, keli ämuton begolön, <Regine> äläädof ed äsagof takediko : <Zedölös ! o lefat ! okegolob lü lovenafamöp.>

Lefat änutom, ed älütenükom ele <Gabriel > nami; täno ye, ägekipölo omi nogna len gün, lü kel ya kuratiko ilogom in cem, äsagom ko smilil lekäfik : <Ologobs odis dönu, o söl yunik !> Sio ogekömol - - - odelo ud udelo.> - Pos atos ägolom lü domayan, e <Gabriel > äsökom eli <Regine> da gad. Ven plödo ikömons sui yebalän, mun äsvieton ini logods onsik. Luveg äbeizugon ve bienayad; ab in at ivedos stilik; te neitapab bal äfliton brumölo love bienavol äslipöl. Töbo mö steps aniko mils fo ons fot labü masat klänöfik blägik okik ätopon. Ven irivons jadis luimöfik, kels äfalons veitiko love yebaläns, <Gabriel > äkanom dasevön xänömi brefik binü peinastams, kel äläpiodugon vü fotüls densitik ini dil löpikurno itopöl fota. Äflanio blegükons tuigemi ed ästepons de xänöm ini nined fota. Luveg, nu in lulit töbo sevädovik, ädugon onis flanio mu nilo ve fotasiem, sodas äkanons selogön vü bims e bimüls balatiks plödio lü yebaläns in munalit topöls. <Regine> ägolof föfo. Munalit ämufäton ninio vü tuigs, ed äjinon lagön äsä tofs len bleds dofik; semikna stral fulik ädrefon jipulakapi blonik, kel täno dü timül kleiliko älelogädikön se dag e sunädo pos atos änepubon dönu ini on. <Gabriel > ägolom seilölo po of; älilom nosi plä noid futas ofik in bleds ün yel büik idofalöls, e jäf cäfas in bimaplöjals; vien no älebladon; te knätär lektinik feinik töbo lilamovik in bleds ätonon. Pos tim brefik se dag fota nim rönölo älükömon ed ätroton jüo ini nil onas. <Gabriel > äloegom flamülön logis tel in nil oka. <Kis at binon - li ?> äsäkom.

Kapreolül äbunof sui veg. <At binon flenädan obik !> jipul ävokädo; täno äföfiorönof sagitavifiko su luveg; nim äsäkon ofi.

>Gabriel > äpöblibom ed ästutom ta bim; älilom noidi bevü bimüls, älilom, das jipul äflapof in nams oka, täno valikos at ämoikon in fag. Ävedos stilik zü om; te musig klänöfik hitüpaneita ävedon dönu lilamovik pro lils oma. Ätaetom natemami; ädalilom, ädalilom vögis feinik mil, vio äsükömons e dönu ämoikons; nu in fag levemik, täno in nil mu nilikün; nememoviko nelaodiko, pianiko ämoikölo e dönu ägekömölo; no äsevom, va äbinons ton fonas, kels ädoflumons da fot lü yebaläns, u va äbinons tons it neita, kels äbinons so melodiks. Göd, kü ilüvom lomi, ledit de mot okik, äjenon ma senäl oma ün tim ya lunüpo pasetik.

Fino jipul ägekömf. Äpladof nami oka sui gün. <Binon so teamik,>
äsagof, <suvo rönobs kobo !>

Noidil ➡lägiana ägalükon omi. <Gö !> äsagom, <jonolös obe
vegi !> Äseilof dü timül; tän fölölo vipi lotana, ädeikof de luveg, su kel jünü
itevons, ed ägolof traväro ini fot. Is luveg pibevegöl alseimik no ädabinon;
bimavuls äkripons love glun ed ägleipons futi tevana; tuigs ädoniolagöl
äflapons omi ini logod ud ägleipons len gün omik; ävedos so dagik, das no
fovo äkanom dasevön magedi jipula, kel, ko sev fota e nen däm, äsleafof da
tuigem. Ab ömna, ven om, süpiko dub spins nelogädik päkratedöl, no
äkanom taetön vokädi nesufädik, ällilom fo ok smili ➡badöfafredik ofa. Fino
ye ästebedof omi ed ätenükof seilölo ome po ok nami oka. So älaigolons.
Fagao lemür ätonon; <Gabriel > ädalilom. <Binon ➡lovenaf,> äsagof, us
dono bug binon.> Suno äfägom ad distidön kleiliko noidi gubaflapulas; tän
süpiko bims äseaditons, ed äselogons nentupiko ini län lardik, kel in
➡züliuns sofiko dub mun pilitüköl, ätopon futü ons. Yebaläns löliko pitegons
me dav largetagedik; love ons luveg äzugon äs liun dofik donio lü bug.
Munalokam äs pon äzugon drimölo love vat; ➡lovenaf de flan votik äkömöl
älogädikon ebo äs jadamagod in sviet litik. <Gabriel > älogom donio lü jol
visoik; ab älogom te voali e luliti.

<No golobsös fagikumo !> jipul äsagof, ed ätirof nami okik se omik;
<is love yebaläns veg zugon lü lovenafamöp; no okanol pölavegön.>

Ons it ästanons nog in jad; ab pö bundan lita, kel ädabinon plödo,
äfägom ad dasevön magedi lölik ofik e mufi alik limedas ofik. Dü rön
ilöpiotanof heraflökotis ofik, kels nu äsä kronül äseatons su kapasömit ofa.
Äsümätof süpo lü om so pleidik ä jivirganik; no äkanom deflekön logis oka de
of, ven äjonof plödio äi munalit, ed äjonof ome vegis, kelis ömutom begolön.

<Adyö ! o <Regine> ! äsagom, ed älülenükom ofe nami.

Ab ägestepof boso de om, ed äsagof zogiko : <Sagolös obe nog dini
bal ! . . . kikodo mutol - li golön ini krig ?>

VÖDS TEFIK

BADÖFAFREDIK
KÄN
MASAT
LÄGIAN
LEMÜR

mischievous
a cannon
a mass
a belt
a splash

LOVENAF
LÜLENÜKÖN
SUFIDÖN
SÜMÄTÖN (LÜ)
ZÜLIUN
a ferry (boat)
to stretch out
to bear (= tolerate)
to seem (to someone)
an outline

PÄRLATS VÖLADA GRETIK**PÄRLAT VELID**

Da medits dibik at, ➤skemat lölik jafäda, fa mödikans so gidiko eli <Disein Gretik> penemöli, ebeigolon bei logs suema obsik. Ün dels anuik, pro anikans ya so töböls, menef flagedon dini bal, do jenöfo no dasevon osi. Din bal at binon nos votikos, ka: suem koda dabina onik is, kiöpio jonidükon, kios kanon padunön in tef at. El <Disein Gretik> äsä elogobs oti nu pianiko maifüköli, ➤steton one valikosi, kelosi desiron ad sevön. ➤Steton one utosi, kelos binon benosek, ab i ➤steton one utosi, kelos binon lepök.

At no binon naed balid, das el <Nun Gretik> at ➤penotükon. Ün ➤menäd valik, in klimat valik, laodiko petidon fa mens ➤nenumovik, kels esteifons ad suemön te dini bal, sevabo : lio ➤kevobön in el Disein gretikün valikas. Klien menefa ün tim anuik, klien, keli te mögon pabepenön äs klien liedik, sevabo, das el <Nun Gretik> pabepenonöd ma pat pulikün, nosi lüvonöl lü fäg jafovik menefa, binon klien ➤rübüköl. No dabimon nun diba somik obas, kel kanon ➤lesagön, das vero binon mu lölöfik in dils valik ota. Nun seimik, kel ➤lesagon otosi muton getön mafi dota somik, keli so vemo meriton.

Se mens balionas mödik adelo, kels lödükons sürfati tala, alikan dalabon gitäti ➤nelovedutovik i ➤gididi ad shudön, binälü okik, elilöls nuni ➤skäto, kion binon sinif fulikum ota. Pro anikans, el <Nun Gretik> osinifon valikosi - podasumon ko löf nefomälovik, fuliko esuemöl e plago nendöfiko efölöl. Pro anikans osinifon ti nosi, e sek ota leigo omafon äs nosi. Atos binos dif vü daglof tefü dins lanöfik e def ota. ➤Magedi at bofikans obas sevoms vemo gudiko. Plekobs, das stad ➤büik ovedonöv seimikna ➤nom, ab vi ! vio fagik de obs binon del et ! Privilegi, ye, eplakobs ad küpedön i obs, too fagao, skemati sublimik Jafäda ot. Ab lio osüadükobs utanis, kels binons nätimiks e löfiks obes, völada ona, e veütikumo verata ona - li ? Vero fikul nonik jonon oki in tef at. If utos, kelos pasagon binonöv verik, tän ofilos äs fil ➤nekvänovik in lad e lan ➤dalilana obas.

Verat binon garan okik. If no filonöv so in lad e lan ➤dalilana, täno do verik oko, no nog binon verik pro on. (= ➤dalilana). Suemolöd, das verat, - igo verat ➤leverik - modü semik defon jüs podasumonöv fuliko e löliko fa lad e lan. Datikolöd osi, ed otuvöl osi verat jenöfik. Mödikans oblümöns ad sagön ole: <Ab if rig obsik vero ibinonöv in Lanal, täno mem obas ota, no übinonöv - li obes so kilik äs del it ? Kelose ogespikobsöv : <If te ikanobsöv blebön nilikumö Lefone Valikosa et, täno lit jönikün et nino übinonöv ya kilikumö, e, banöls ai in glor ota, dots obas übinonsöv nedabiniks.>

I:7:99

Ven slipobs, juitobs jenöfo sevedi votik plödo stäänikam aldelik nomik obas, ab liomödikans dabinons - li, kels kanons vero digidön nivodi geilikum seveda at ? Too binos seved ebo at, kel ♪löökos obis nilikumo lü Lefon Dabina obsik, lü Lefon ot, in kel äbinon rig obsik it. Seved slipa ♪sonemik ♪löökon oli lü seved et, kel binon nilikumo sevede obsik lönik, e binos vero stunabikos ! ♪Tikasököd at neodon steifi pluik - no ♪seletolös pöti gönik at sublimik dasuema gretikum.

De rig obsik lanöfik, pärlat et lejerikün pärlatas valik, da Bin, Lif, Dunöf, Proged e Votafomam, ugekömbos ebo dönu kiöpa eprimobs. Leigo äs rig obsik binon in Lanal, Bos et ne ♪fümükikün, i ♪finot obsik obinon in Lanal. Lefred kion oduton obes ün tim okömöl et ! No obinon - li kuratiko etos, ♪binäliko, stada obsik - li ? E kanobs sagön bosi plu, - das do ♪binäliko otos, no odalabos - li i ♪liegöfi ♪läyümik, rigo no ädalaböli, keli tev obsik da el <Disein Gretik> Jafäda ugevon obes - li ? Si ! no dabinon dot seimik, das atos obinos soik. Sens kion löfa leplekik tikäds at sötönsöv ♪süvokön in binäl obsik lönik ! Lif obsik ♪tefädik, vio sötönöv löliko pageidon e ♪pageilükumön fa ons.

Su kiens lana obsik meditobsös liudi pärlatas völada gretik, keli ♪egleipülöbs ko devod e löf somiks. Nid pärlatas primik e lätikas nidon ko nid somik nebepenovik; kodü atos, ♪lestralon love retis valik; too nid retas in mod seimik difükon sovemo glori ♪valodik.

O blod löfik ! mutobs stopön, bi utos, kelosi edesirobs ad dunön pedunos. Leadonös plek at, in stun e löf petikodöl, ♪naböfodönuön valikosi, kelos pesagos :

O Stunidal Valaglorikün !

Kipölös obis fiedikis lü rig obsik in Ol,

Me lesteif obsik Geilikünose

E Gudikünose, kelis sevobs;

Adas, me lit Olik sanüköl i lifüköl,

Okanobs binön, in verat verik :

Balans ko Ol, Balal Bina,

In löf, e püd, i fred,

Ai ed ai plu - laidüpo.

So binosös !

VÖDS TEFIK

BINÄLIKO

BÜIK

DALILAN

FÄG

FINOT

GEILÜKUMÖN

GIDID

in essence

former

a hearer

a faculty

a goal

to enhance

responsibility

GLEIPÜLÖN

JAFÖVIK

KEVOBÖN

LÄYÜMIK

LEPÖK

LESAGÖN

LEVERIK

to handle

creative

to co-operate

additional

a failure

to claim

absolute

